

Promoziun exemplarica dals emprendists

La Ems Chemia vegn undrada cun il Premi naziunal da furmaziun

DA MARTIN CABALZAR / FMR

■ **En reconuschientscha da sia lavur exemplarica en favur da la furmaziun professiunala è la Ems Chemia vegnida onurada cun il Premi naziunal da furmaziun. Stersas saira è la surdada vegnida celebrada en preschientscha dals emprendists e da represchentants da la politica e da l'economia en la Cantinetta da la Ems Chemia a Domat.** Il Premi naziunal da furmaziun dotà cun 20 000 francs vegn surdà cuminaivlamain da la Fundaziun Hans Huber e da la Fundaziun da las Scolas autas spezializadas da la Svizra. Sco quai che la scheffa da l'interpresa *Magdalena Martullo* ha tradì vers la FMR vegnan ils daners dal premi investids per la realisaziun d'ina app interna per las emprendistas e per ils emprendists. Cun questa investiziun vul Martullo meglierar la comunicaziun tranter emprendists e mussader, rinforzar l'accompagnament persunal ed intermediar materialias d'emprender e d'exercizi sco era simplifitgar l'administraziun.

In manaschi da furmaziun attractiv

Cun la surdada da quest premi veglian ins accentuar e reconuscher la muntada ed il success dal sistem dual en la furmaziun professiunala, ha ditg *Christian Fiechter*, il parsura da la fundaziun. Damai ch'i saja gist actualmain difficil da chattar emprendists saja zunt impurtant d'accentuar ils avantatgs d'ina furmaziun professiunala cun emprendissadi. En la retscha illustra dals purtaders dal premi figurescha sper interpresas renomadas sco Amag, UBS, Swatch e Stadler Rail uss da nov era l'interpresa grischuna Ems Chemia. La Ems Chemia na saja betg mo sa profilada sco producenta da materials spezial, ella haja era merits spezial per la furmaziun da giuvens mastergnants, ha menziunà Fiechter en sia laudaziun. Per obtegnair quest premi exclusiv sin plaun naziunal stoppian las interpresas

ademplier ina lunga glista da criteris. La Ems Chemia haja ademplì praticamain tut quest criteris e quai a moda suverana. La finamira primordiala saja da porscher als giuvenils ina buna furmaziun professiunala per la finala avair agens buns artisans. Quai che la Ems Chemia prestia en quest sector surpassia per bler las mesiras usitadas. Tar ses engaschament a favur da la furmaziun professiunala tutga tranter auter cunzunt la promoziun temporiva sco ils champs da mint, l'exposiziun Emsorama e l'Emsorama mobil sco era las stentas d'intermediar durant la furmaziun professiunala era cumpetenzas socialas sco era da pussibilitar dimoras da furmaziun en las sedias da la Ems Chemia en l'exteriur. Adina puspè han las emprendistas ed ils emprendists l'ocasiun da preschentar lur lavurs a la publicità, saja quai a las radunanzas generalas da l'interpresa avant millis d'auditurs ed aspectaturs u a chaschun d'exposiziuns ambulantas en il Grischun u ordai fer. La lavur tar la Ems Chemia saja dentant tut auter ch'in «job da tshigulatta», ha accentuà Fiechter. Uschia quintan ins cun ina nota finala da minimum in da tshintg, quai che vegnia la finala era cuntanschì senz'excepciun.

Engaschi en la furmaziun d'emprendists dapi 1943

Cun plaschair ha la scheffa da l'interpresa e cussegliera naziunala Martullo prendì encunter la trofea or dals mauns da Fiechter, «era sche quella n'è betg construida en material artificzial da la Ems Chemia», sco ella ha manegià sibillinica-main. Per la Ems Chemia saja ina buna furmaziun professiunala «ina pitga impurtanta per l'abiltad d'innovaziun da l'interpresa». Radund 75 pertschient da ses collavurats hajan absolvì in emprendissadi. La Ems Chemia porschia gia dapi 1943 la pussaivladad d'absolver in emprendissadi. Quest onn saja *Daniel Caluori* stà l'emprim ch'ha fatg l'empre-



La scheffa dal concern *Magdalena Martullo* demonstrascha a cusseglier guvernativ *Jon Domenic Parolini* las funcziuns d'in'apparatura da l'Emsorama.

FOTO TH. GSTÖHL

dissadi da laborant tar l'anteriura fabrica da zutgerificaziun da cellulosa/laina. En il fratemp porscha la Ems Chemia posts d'emprendissadi per 15 professiuns ed ha furmà en tut quels onns passa 3000 emprendistas ed emprendists, ha ditg Martullo.

Gratulaziun da la regenza

Sortind dal citat «I na dat nagut dal bun, auter ch'ins fa sez» dad *Erich Kästner* ha cusseglier guvernativ *Jon Domenic Parolini* accentuà l'eminenta muntada economica d'ina buna furmaziun professiunala per il Grischun. La Ems Chemia fetschia quai exemplaricamain. Il directur d'educaziun grischun suttastritga ils avantatgs da noss sistem da furmaziun

dual e sa bun grà a las interpresas che pussibileschan a la giuventetgna ina buna basa per industria e mastergn. Als emprendists appellescha el da nizzegiar la schanza da furmar activamain lur avegnir professiunala.

Per il chantun saja Ems cun ses 140 emprendists e passa 1000 posts da lavur in impurtant partenari. L'interpresa saja era s'engaschada activamain e finanziar-main per la realisaziun da l'anteriur Tecnicum da la saira e per l'actuala Scuola auta spezializada. Per quai sa la regenza bun grà a la Ems Chemia che na saja uss betg mo il pli impurtant patrun da lavur da la Svizra sidorientala, mabain uss uffizialmain in dals megliers lieus da furmaziun da l'entira Svizra.